

05 JUL 2002

Mahathir-Ringggit (Bergambar)

TAMBATAN RINGGIT TETAP DIKEKALKAN, KATA PM

JITRA, 5 Julai (Bernama) -- Datuk Seri Dr Mahathir Mohamad hari ini berkata kerajaan akan mengekalkan tambatan Ringgit terhadap Dollar Amerika yang dilaksanakan sejak beberapa tahun lalu dan tidak akan melayan permintaan pihak tertentu supaya tambatan itu dikaji semula.

Perdana Menteri berkata dahulu sewaktu nilai Ringgit nampak rendah, pihak tertentu menyuruh kerajaan menurunkan kadar tukaran Ringgit dengan mata wang asing.

"Kalau kita ikut nasihat orang ini, jadi macam yoyo. Naik sekejap turun sekejap, naik sekejap turun sekejap," kata beliau semasa menjawab soalan pemberita yang bertanya adakah dalam tempoh 16 bulan sebelum beliau bersara sebagai Perdana Menteri tambatan Ringgit itu akan dikaji semula.

Dr Mahathir yang juga Menteri Kewangan sebelum itu mendengar taklimat dan melawat projek pembinaan Dewan Wawasan serta merasmikan perletakan batu asas kompleks pentadbiran daerah Kubang Pasu di sini.

Malaysia menambat nilai Ringgit kepada RM3.80 bersamaan satu dolar AS berikutan kegawatan ekonomi dunia pada 1997.

Perdana Menteri berkata keadaan nilai mata wang yang turun naik dengan cepat menyusahkan golongan peniaga yang berurusan dengan negara luar.

Katanya, walaupun kerajaan telah menambat nilai mata wang negara ini, ia tidak akan mendatangkan masalah sekiranya nilai mata wang negara lain berubah.

Dr Mahathir berkata dengan tambatan Ringgit itu juga perniagaan masih boleh berjalan dengan lancar dan eksport negara masih dalam keadaan baik.

Kepada satu soalan sama ada beliau akan melantik Menteri Kewangan Kedua, Dr Mahathir secara berseloroh berkata:

"Saya sedang memikirkannya, kalau ada permohonan, saya sedia mempertimbangkannya termasuk daripada pihak media,".

-- BERNAMA

MZM/JM AA